

Von den Parelijs oder
bey Sonnen.

Er gnädige hochgetrewe Barmherzige himli-
sche Vater / der es mit vns armen Kindern Herzlich gut mei-
net / vnd für vnsern schaden / vnd vor der Thür stehendem Un-
glück vns warnen wil : hat abermahl in der Luft / vnter seinem
hohen himlischen Stuel / ein grosses Wunderzeichen / nemlich
am Palmstage / den 3. Aprilis, dieses 1610. Jahrs / zu oberst
am Himmel vmb 12. vhr des hohen Mittages / fünff Sonnen / oder vier bey Son-
nen / den Physicis Parelia genant / sehen lassen : Dieweil die andern Wunder / so
newlich sich auch begeben / albereit aus vnserm Gehirn gantz verflossen sind / vnd
wir nicht mehr gedencfen an die Cometen des 1604. vnd 1607. Jahrs : Nicht
mehr an den Iridem Lunarem, oder Mondenbogen des nechstvergangenen
1609. Jahrs : Ja auch nicht an die vnterschiedene terra motus oder Erdbidem /
Item gewlichen Donner vnd Blitz im Ianuario dieses 1610. Jahrs / so an vie-
len örtern / cum stupore & usq; ad miraculum, vernommen worden : Wie im-
gleich die vngewönllichen vnd vngheurlich grassierenden Variolæ oder Boocke
vnd Blattern / so bey vns / vnd in vielen Ländern grausam vnter Jungen vnd
Alten hauffgehalten haben / vnd an eilichen örtern noch thun / gar in den wind ge-
schlagen werden.

Muß derwegen vnser lieber Herr Gott ein ander mittel zur Buspredigt
herfür suchen / nemlich die liebe Sonne am Himmel / sintemahl die vorigen vnd
ieso erzehleten Wunderzeichen / wie gedacht / nu gar vergessen seind : Auch beides
die im Römischen Reich / so wol außershalb desselben / allerley Embörungen vnd
gefährliche spaltungen / so auff ein gewlich Blutbadt außsehen / vns nicht bewe-
gen wollen.

Weil dann diß Phasma vnd Wunderzeichen nicht der geringsten eins / son-
derlich darumb / daß es im hohen Mittage geschehen / vnd so gar gewlich auff
dißmahl anzuschawen gewesen / als in keinem Schribenten junior dergestalt auff-
gezeichnet gefunden wird : So ist es billich / daß die sichere ruchlose Welt etwas
davon vnterrichtet werde / vnd man es mit stillschweigen nicht vorüber gehe / nach
dem